

# PRIHATIN KESUSAHAN SESAMA INSAN ELAK KESUSAHAN HARI KIAMAT

Oleh: JHEAINS

الْحَمْدُ لِلَّهِ الْقَائِلِ:

وَمَا يَفْعَلُوا مِنْ خَيْرٍ فَلَنْ يُكْفَرُوهُ وَاللَّهُ عَلِيمٌ بِالْمُتَّقِينَ ﴿١١٥﴾

(Surah Ali Imran, ayat: 115)

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ  
وَرَسُولُهُ. اللَّهُمَّ صَلِّ وَسَلِّمْ عَلَى الْهَادِي الْبَشِيرِ وَعَلَى آلِهِ وَصَحْبِهِ وَمَنْ  
اهْتَدَى بِهَدَاهُمْ عَلَى الدَّوَامِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

**SAUDARA MUSLIMIN YANG DIRAHMATI ALLAH SWT,**  
Allah SWT berfirman di dalam kitab suci-Nya:

وَلَا جُرْأَلْآ خِرَةَ خَيْرٌ لِلَّذِينَ ءَامَنُوا وَكَانُوا يَتَّقُونَ ﴿٥٧﴾

Maksudnya: “Dan sesungguhnya pahala hari akhirat lebih baik bagi orang yang beriman serta mereka pula sentiasa bertakwa.” (S. Yusuf: 57).

Sehubungan itu, marilah kita isi kehidupan yang sementara di dunia ini dengan mengerjakan perkara-perkara yang diperintahkan oleh Allah SWT dan menjauhi segala yang dilarang-Nya, mudah-mudahan kita beroleh pahala serta tergolong sebagai orang yang beriman dan bertaqwa.

**JEMAAH JUMAAT YANG BERBAHAGIA,**

Antara sebab yang menghakis semangat persaudaraan, kasih sayang dan prihatin dalam masyarakat ialah sifat mementingkan diri sendiri.

Apabila sifat itu mencengkam jiwa seseorang, maka timbullah perasaan rakus dan tamak kerana hanya melihat dunia dan isinya sebagai unsur-unsur untuk memenuhi tuntutan dan keinginan atau kepentingannya sendiri tanpa melihat kepada sumbangan dan kepentingan terhadap orang lain di sekelilingnya.

Justeru, Islam mendidik umatnya untuk memahami erti kehidupan sebenar. Selain menitikberatkan soal peribadatan kepada Allah SWT, Islam juga memberi penekanan kepada usaha mengurus masalah-masalah yang berkaitan dengan kehidupan bermasyarakat. Ia bertujuan memastikan kesejahteraan dan perpaduan masyarakat berbilang kaum terus terpelihara dan lestari.

Ini bererti, nilai persaudaraan, kasih sayang dan prihatin yang berjaya dipupuk dan disemai pada bulan Ramadan dan Syawal perlu diteruskan kerana ia menjana perpaduan dan kesejahteraan hidup. Tambahan pula, orang Islam itu adalah ibarat satu tubuh badan, apabila salah satu anggota sakit, maka keseluruhannya akan berasa sakit. Maka, menjadi kewajipan bagi umat Islam memastikan agar segala nilai-nilai yang baik yang berjaya dipupuk dalam bulan Ramadan dan Syawal dapat terus diamalkan selagi hayat dikandung badan kerana sesungguhnya ia bukanlah terhad pada kedua-dua bulan tersebut sahaja. Ini termasuklah sikap prihatin atau peduli terhadap golongan yang kurang bernasib baik dan memerlukan pertolongan.

### **KAUM MUSLIMIN RAHIMAKUMULLAH,**

Hakikatnya, selaku hamba, kita wajib mengabdikan diri kepada Allah SWT dengan melaksanakan segala perintah-Nya pada sepanjang masa hingga ke akhir hayat. Bertitik tolak daripada asas inilah, maka kita hendaklah berkongsi kegembiraan dan kesedihan secara bersama sekali gus merungkaikan sifat bakhil dan tamak di hati dengan memberi sumbangan atau infak kepada saudara-saudara kita yang diselubungi musibah atau penderitaan.

Firman Allah SWT:

ءَامِنُوا بِاللّٰهِ وَرَسُوْلِهِۦ وَاَنْفِقُوْا مِمَّا جَعَلَكُمْ مُّسْتَخْلِفِيْنَ فِيْهِ ۗ فَاَلَّذِيْنَ ءَامَنُوْا مِنْكُمْ وَاَنْفَقُوْا هُمْ اَجْرٌ كَبِيْرٌ ﴿٧﴾

Maksudnya: *“Berimanlah kamu kepada Allah dan Rasul-Nya, dan belanjakanlah (pada jalan kebajikan) sebahagian dari harta-benda (pemberian Allah) yang dijadikan-Nya kamu menguasainya sebagai wakil. Maka orang yang beriman di antara kamu serta mereka membelanjakan (sebahagian dari harta itu pada jalan Allah); mereka tetap beroleh pahala yang besar.”* (S. Al-Hadid: 7).

Melalui firman-Nya ini, Allah SWT menjelaskan bahawa manusia bukanlah pemilik sebenar harta yang ada. Allah SWT adalah pemilik mutlak kekayaan berkenaan, sedangkan manusia sebagai makhluk-Nya menjadi wakil untuk mengurus harta yang dimiliki. Ini bermakna, harta itu hendaklah dibelanjakan menurut syariat-Nya yang antaranya mendermakan harta yang dikurniakan Allah SWT itu kepada mereka yang berhak menerimanya agar memperolehi satu kepuasan dari segi rohani kerana dapat melaksanakan perintah Allah SWT.

Jadi, Islam menggalakkan umatnya memberi pertolongan dan bantuan kepada orang yang susah serta memerlukan bantuan sama ada daripada segi harta benda, kewangan, makanan dan sebagainya.

la bagi meringankan beban serta penderitaan mereka yang kurang bernasib baik disebabkan faktor kehidupan mahupun ditimpa musibah kemalangan atau bencana alam. Di samping itu, amalan bersedekah atau menderma juga dapat mengelakkan diri daripada mementingkan diri sendiri sekali gus memupuk budaya penyayang dan mempererat persaudaraan.

### **SIDANG JEMAAH YANG MULIA,**

Sesungguhnya sebaik-baik manusia adalah yang paling bermanfaat bagi manusia yang lain. Oleh itu, marilah kita anjak diri kita menjadi insan yang baik dan mulia dengan memberi manfaat kepada insan-insan yang lain terutama sekali para mangsa musibah dan bencana alam serta golongan fakir, miskin dan anak-anak yatim. Seruan ini bertepatan dengan Hari Pahlawan yang disambut pada tanggal 31 Julai setiap tahun.

Hari Pahlawan adalah hari yang amat bersejarah dan besar ertinya bagi seluruh rakyat Malaysia. Ia adalah saat dan ketikanya kita mengenang dan menghargai jasa pahlawan kita yang hayatnya diisi dengan perjuangan membela kedaulatan tanah air tercinta tanpa mengira keringat, harta, masa dan sebagainya. Mereka berjuang mengerahkan seluruh hidup dan kehidupannya demi melihat tertegaknya sebuah negara merdeka yang berdaulat di persada pertiwi tercinta ini.

Maka, pengorbanan yang dilakukan golongan ini adalah amat besar dalam hidup seorang manusia yang tidak semua orang boleh menikmatinya atau melaksanakannya tanpa ada cukup keberanian, rasa tanggungjawab dan semangat cintakan kepada negara. Ini kerana, mereka ini sanggup menggadaikan nyawa, meninggalkan keluarga tersayang dan segala-galanya demi keamanan negara dan keselamatan penduduk yang lain. Kerananya, mereka yang melaksanakan pengorbanan ini telah menabur jasa dan bakti yang amat besar dan bermakna sehingga tidak dapat dinilai dengan wang ringgit.

Pendek kata, keamanan, kestabilan dan kesejahteraan yang kita nikmati pada hari ini tidak akan dapat kita kecapi tanpa pengorbanan yang dilakukan oleh mereka yang bergelar pahlawan. Keikhlasan mereka berjuang tidak mengharapkan sebarang balasan dari mana-mana pihak.

Bagi mereka, segala keringat, masa, harta dan kasih sayang yang dicurahkan sudah berbaloi dengan tertegaknya sebuah kemerdekaan yang menjadi kebanggaan setiap lapisan masyarakat yang mengetahui dan menghargai erti sebuah kemerdekaan.

### **HADIRIN JEMAAH YANG DIKASIHI ALLAH SWT,**

Dalam situasi negara yang sudah merdeka dan aman makmur kini, kewajipan kita bukan lagi sekadar mengenang serta memperingati jasa mereka yang telah berkorban untuk tanah air tercinta semata-mata. Ingatlah, para pejuang yang telah pergi mahupun yang mengalami kecederaan mempunyai keluarga sama ada balu mahupun anak-anak yang perlukan pembelaan.

Jadi, peranan serta kewajipan kita adalah untuk memastikan kebajikan mereka itu mendapat pembelaan yang sewajarnya. Ini boleh kita lakukan dengan menghulurkan sumbangan setakat yang termampu kepada Tabung Rayuan Hari Pahlawan yang dilancarkan setiap kali menjelang tanggal 31 Julai, iaitu tarikh di mana kita menyambut dan meraikan Hari Pahlawan.

Rasulullah SAW bersabda yang bermaksud: *“Siapa yang melepaskan kesusahan saudaranya, Allah akan melepaskan kesusahannya nanti pada hari kiamat.”* (HR Bukhari).

Sehubungan itu, pelbagai pihak dan orang perseorangan adalah dialu-alukan untuk membantu menjayakan kempen mengisi Tabung Rayuan Hari Pahlawan (TRHP) 2015 sebagai tanda mengenang dan menghargai jasa serta pengorbanan perwira negara.

Meskipun derma, kesedaran, keinsafan dan simpati semata-mata tidak akan dapat mengurangkan penderitaan pahlawan atau anggota pasukan keselamatan yang telah hilang upaya, anak-anak dan isteri yang kehilangan tempat bergantung, namun rakyat hendaklah terus meningkatkan semangat kepahlawanan, patriotisme, kesetiaan, kecintaan dan sanggup berkorban untuk Negara. Semangat berkenaan perlu dipupuk dan disemarakkan sepanjang masa sebagai menghargai dan mengenang jasa para pahlawan yang sanggup melakukan pengorbanan tertinggi demi kedaulatan negara tercinta.

### **SAUDARA MUSLIMIN YANG DIMULIAKAN ALLAH SWT,**

Pada zaman Rasulullah SAW, terdapat ramai dermawan seperti Sayidina Abu Bakar, Sayidina Uthman bin Al-Affan, Abdul Rahman bin Auf RA dan lain-lain lagi, yang sanggup mengorbankan harta kekayaan mereka ke jalan Allah SWT. Bagi mereka, mengorbankan kekayaan yang dimiliki untuk meninggikan syiar agama adalah pendekatan yang terbaik untuk mencapai kepuasan hakiki dan kerediaan Allah SWT. Maka, sama-samalah kita jadikan semangat serta pengorbanan mereka itu sebagai motivasi untuk membudaya amalan berinfaq bagi meraih balasan serta pahala dari Allah SWT.

إِنَّ الْمُسَدِّقِينَ وَالْمُصَدِّقَاتِ وَأَقْرَضُوا اللَّهَ قَرْضًا حَسَنًا يُضَعْفُ لَهُمْ وَلَهُمْ أَجْرٌ كَرِيمٌ ﴿١٨﴾

Maksudnya: “Sesungguhnya orang lelaki yang bersedekah dan orang perempuan yang bersedekah, serta mereka memberikan pinjaman kepada Allah sebagai pinjaman yang baik (ikhlas), akan digandakan balasannya (dengan berganda-ganda banyaknya), dan mereka pula akan beroleh pahala yang mulia.” (S. Al-Hadid: 18).

بَارِكْ اللَّهُ لِيْ وَلَكُمْ بِالْقُرْآنِ الْعَظِيمِ وَنَفَعِنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِيْ وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ، فَاسْتَغْفِرُودُ، إِنَّهُ هُوَ الْعَفُورُ الرَّحِيمُ.



Diedar oleh:  
Bahagian Penyelidikan dan Informasi  
Jabatan Hal Ehwal Agama Islam Negeri Sabah